

ӘЛЕМДІК ҚОҒАМДАСТЫҚТЫҢ БІРЛІГІ АСА МАҢЫЗДЫ



Президент Қасым-Жомарт Тоқаев Нью-Йорк қаласына жұмыс сапары барысында БҰҰ-ның Орнықты даму мақсаттары жөніндегі саммитіне қатысты. Мемлекет басшысы Мажарстан Президенті Каталин Новакпен бірге БҰҰ-ның «Орнықты даму мақсаттарына (ОДМ) қол жеткізу жолындағы прогресті жеделдетудің негізгі өтпелі процестеріне қатысты ауқымды іс-қимылдарды жандандыру» атты Көшбасшылар диалогының бірінші сессиясында төрағалық етті.

Мемлекет басшысы өз сөзінде БҰҰ-ның 2030 жылға дейінгі күн тәртібі бүгінгі өскелең ұрпақтың жарқын болашақ құруына берілген бір ғана мүмкіндік екенін атап өтті.

— Геосаяси қатығыстарға байланысты шиеленісе түскен қазіргі жаһандық сын-қатерлер біздің ұжымдық күш-жігерімізге нұқсан келтіріп отыр. Бұл кедергілерді еңсеруге жекелеген мемлекеттің шамасы жетпейді. Әлемдік қоғамдастықтың бірлігінің арқасында ғана елеулі жетістіктерге қол жеткізе аламыз, — деді Қасым-Жомарт Тоқаев.

Президенттің айтуынша, Қазақстан үшін Орнықты даму мақсаттарына қол жеткізу — ұлттық басымдық.

— Орнықты даму қағидаттары біздің негізгі ұлттық стратегияларымыз бен

бағдарламаларымыздың өзегіне айналды. Бүгінде орнықты болашаққа белсенді түрде инвестиция құйып отырмыз. Мемлекет бюджетінің 80 пайызы орнықты даму мақсаттарына сай келеді. Біз тегін білім алудың және денсаулық сақтаудың баршаға қолжетімді болуын қамтамасыз етеміз. Жаңа Әлеуметтік кодексте халықтың осал топтарын қорғау шаралары күшейтілді, — деді Мемлекет басшысы.

Президенттің пікірінше, баршаға ортақ орнықты болашаққа қол жеткізу үшін шұғыл түрде бірлескен іс-қимылдар қажет. Осыған байланысты Мемлекет басшысы бірқатар ұсыныс айтты.

— Өзара ынтымақтастықты нығайту үшін аймақтық деңгейде «Біртұтас БҰҰ» қағидатын күшейту қажет. Сондықтан біз Қазақстанда Орталық Азия мен Ауған-

стан үшін Орнықты даму мақсаттары жөніндегі Аймақтық хаб құруды ұсынамыз. Ол БҰҰ-ның аймақтағы жобалық қызметін тиімді үйлестіруді қамтамасыз етеді, — деді Қасым-Жомарт Тоқаев.

Президент саммитке қатысушыларға халықаралық қаржы архитектурасына тын серпін беруді ұсынды. Оның айтуынша, ОДМ-ға қол жеткізу үшін қаржы жүйесі таңдаулы ғана емес, барлық мемлекетке теңдей ықпал етуі қажет. Экология, білім беру және денсаулық сақтау салаларындағы проблемаларды шешу үшін орасан зор қаржы керек.

Қасым-Жомарт Тоқаев климат, азық-түлік және энергетика дағдарысы орнықты дамуға айтарлықтай қауіп төндіретініне тоқталды.

— Біз БҰҰ-ның басшылығымен техникалық қолдау, ғылыми зерттеулер және қауіп-қатерлерді бағалау салаларындағы халықаралықынтымақтастықты нығайтуға тиіспіз. Орнықты даму саласындағы мақсаттар бәріміз үшін жарқын әлемге жол ашады. Біз бірігуіміз және күш-жігерімізді арттыруымыз қажет. Қа-

зақстан БҰҰ-ның орнықты даму саласындағы тегеурінді әрі тиімді рөлін әрдайым жақтайды, — деді Президент.

Сонымен қатар сессия барысында Мажарстан Президенті Каталин Новак, Хорватия Президенті Зоран Миланович, Қырғызстан Президенті Садыр Жапаров, ОАР Президенті Сирил Рамафоса, Аустрия Президенті Александр Ван дер Беллен, Перу Президенті Дина Болуарте, Гайана Президенті Ирфан Али, Микронезия Президенті Уэсли Симина, Солтүстік Македония Президенті Стево Пендаровски, Финляндия Президенті Саули Ниинисте және басқалар сөз сөйледі.

СТРАТЕГИЯЛЫҚ СЕРІКТЕСТЕР СЕРПІНІ

Айта кетейік, Қасым-Жомарт Тоқаевтың БҰҰ Бас Ассамблеясы 78-сессиясының аясындағы екіжақты келіссөздер бағдарламасы Мажарстан Президенті Каталин Новакпен кездесуден басталған болатын. Мемлекет басшысы бауырлас халықтар арасында тарихи және мәдени байланыстарға негізделген стратегиялық

серіктестік орнағанын атап өтті. Президент Мажарстанның түркі ынтымақтастығын нығайтудағы белсенді ұстанымын және елеулі үлесін жоғары бағалады.

Қасым-Жомарт Тоқаев биыл қараша айында Қазақстанда Түркі мемлекеттері ұйымының мерейтойлық 10-саммиті өтетінін айтып, аталған жиынға Мажарстан Премьер-министрі Виктор Орбан қатысады деп жоспарланып отырғанын жеткізді.

— Еліміздің Мажарстанмен тығыз ынтымақтастық орнатқанын атап өткім келеді. Елдеріміз арасында өте сенімді, дәстүрлі байланыс қалыптасқан. Біз екіжақты ынтымақтастықтың қазіргі деңгейін жоғары бағалаймыз. Осы сәтті пайдаланып, Сізді Қазақстанға сапармен келуге шақырамын. Сонымен қатар Түркі мемлекеттері ұйымының саммитінде Премьер-министр Виктор Орбан мырзамен кездесеміз деп үміттенемін, — деді Мемлекет басшысы.

(Жалғасы 2-бетте)

Сіз не дейсіз?



Ерлан Әбдиев, Парламент Мәжілісінің депутаты, «AMANAT» партиясы фракциясының мүшесі:

ДЕМОКРАТИЯ ӨНІРЛЕРДІ ӨРКЕНДЕТУГЕ ҚЫЗМЕТ ЕТПЕК

«Мықты өңірлер – экономиканың драйвері». Бұл тәмсіл қызыл сөз үшін ғана айтылмауы тиіс. Олай болса, ауыл, аудан, қала тынысын аша түсетін тың қадамдарды батыл жүзеге асыра беру қажет. Осы орайда Мәжіліс депутаты, «AMANAT» фракциясының мүшесі Ерлан Әбдиевтің пікірін білген едік.

(Жалғасы 3-бетте)

ОТАНДЫҚ МЕДИЦИНАДА ДАҒДАРЫС КҮШЕЙДІ

Медицина қызметкерлерінің көңіл күйі түсіңкі, рухы жаншылған. Екі айдан бері жалақы алмағаны бар. Тіпті, емханалар тонометр мен термометр сатып алуға медперсоналдан ақша жинаған. Бірқатар аурухана штатты қысқартты. Коммуналдық қызмет ақысын кешіктірудің деп монополистер жылу мен судан ажыратып тастайтынын ескертіп, қорқытып жатыр... Бұл – 90-жылдардағы тоқыраудың әңгімесі емес, бүгінгі жағдай. Үкімет емханалар мен ауруханалардың кредиторлық берешегі мәселесін қалай шешпек?



МЕДИЦИНАЛЫҚ САҚТАНДЫРУ ҚОРЫ

Сарапшылардың айтуынша, медициналық ұйымдар бір-біріне денсаулық сақтау жүйесінде және өзге өнім мен қызмет жеткізушілерге 100 млрд тенгеге

жуық қарыз болып қалды. Алапат берешектің басым бөлігі коммерциялық клиникаларға емес, мемлекеттік емханалар мен ауруханаларға тиесілі.

Қамырдай күмпип, барған сайын ұлғайған қарызды азайту үшін төтенше шаралар қабылданып жатыр. Медициналық ұйымдар ең маңызды дүниелерден де үнем қылуға мәжбүр: қызметкерлердің жалақысы кемітілген, сыйақылар беру доғарылған, сырқаттарды емдеуге қажетті жабдықтарды, дәрі-дәрмекті сатып алу тоқтатылған. Жоспарлы, тіпті шұғыл операциялар кейінге шегерілуде.

(Жалғасы 4-бетте)

ҚАЗАҚ ҒЫЛЫМЫ ҚАЙТСЕ ДАМИДЫ?



Соңғы жылдары мемлекет тарапынан ғылымға ерекше қолдау көрсетіліп келеді. Енді ғылыми жобаларды қаржыландыру қолға алынып, жыл сайын жас ғалымдарға 50 ғылыми стипендия берілетін болды. Жалпы, отандық ғалымдардың жобалары қай салаларда қолданысқа енгізіліп жатыр? Қазақ ғылымының ертеңінен күтер үміт қандай? 5»

МОНОҚАЛА: ҮМІТ ШАМЫ ҚАЙТА ЖАНДЫ...



5
БЕТ

КІТАП САЛТАНАТ ҚҰРҒАН КҮН



8
БЕТ

УЧАСКЕЛІК ПОЛИЦЕЙДІҢ БІР КҮНІ

Кейінгі жылдары заңгерлер мен құқық қорғаушылар түрмедегілердің санын азайту туралы жиі мәселе көтеріп келеді. Мамандардың ұсынысына келгенде қоғамның пікірі екіге жарылады. Бірі – абайсызда жасалған қылмыс үшін темір торға тоғыта бергенше, бостандықта жүріп қателіктен сабақ алғанын құп көреді. Екіншілері – түрмедегілерді қолдан азайтып, қылмыскерге жеңілдік жасалса, жәбірленушінің құқығын аяққа таптаумен бірдей дегенді алға тартады. 6»



